

Kutungu Luzingu ya Mbote na Nzila ya Bible --

Contentement--Kuvanda na Kiese na Yina Nzambi Me Pesa Nge, Kuyuma Ntima Ve sambu na Bima ya Nkaka

Musoniki: Mama Lorella Rouster, MCE

Disongila: Kuvanda na Kiese na Yina Nzambi Me Pesa Nge (français contentement)

Kuvanda kiese to kuyikana na mpila Nzambi me sala nge ti yina Yandi me pesa nge, na ntima mosi ya pima ti ya lutondo. Kutula ntima nde konso ntangu, Nzambi ke na lukanu na mpila Yandi pesa nge bima to pesa nge ve, ti lukanu yina kele sambu na mambote ya bantu mvu ya mvu. Kulomba Yandi bima ya nge ke na yo mfunu lumbu na lumbu, ebuna kubika na maboko ya Nzambi yina ya Yandi ta pesa nge.

Contraire: Kuyuma Ntima sambu na Bima ya Nkaka (français: avide, regarde de convoitise)

Kuyuma ntima na nzala ya bima kuluta sambu na nge mosi sesepiyai, kukonda kukinga Nzambi kupesa bima ya Yandi mona mbote. Kuyuma ntima sambu nge kuzwa bima kukonda kuyindula yina ya bantu ya nkaka ke na yo mfunu, kukonda kuyindula inki ta sadisa lukanu mvu ya mvu ya Nzambi. Mpeve mosi ya kele kukangama kaka na nzala ya nge mosi, mpeve ya kele kiese veata kana nge kuzwa bima ya nge mona mfunu, mpeve ya kele na lutondo ve na bampila ya Nzambi me sakumuna nge dezia.

Mabanza yai tula bima na sika ya Nzambi bonso kiteki, sambu nge ta sala yonso, ata kusala masumu, sambu na kubaka yo. Yo kele bonso nge mosi me kuma Nzambi, sambu ntangu nge yuma ntima sambu na bima ya Nzambi me pesa nge ve, nge ke yindula nde nge bakisa inki kele mbote sambu na nge kuluta Nzambi.

Nki diswasanu na kati ya mabanza yai zole:

Kuvanda na kiese na yina Nzambi me pesa nge ke songa nde Nzambi kele mbote. Yandi kele mbote na mono. Mono lenda tula Yandi ntima nde Yandi ta pesa mono inki me luta mbote. Kuvanda na kiese na yina Nzambi me pesa nge kele mbote. Nzambi zola bantu na Yandi kuvanda mutindu yina.

Kuyuma ntima sambu na bima ya nkaka ke songa nde mono ke zaba ve kana Nzambi kele mbote. Mono ke lunga na bima kuluta ti bima kuluta mbote SESEPIYAI. Ebuna mono fweti baka yo, ata na bampila yonso, ata mpila yina kele masumu. Kuyuma ntima sambu na bima ya nkaka kele masumu. Nzambi zola yo ve, ti Yandi zola ve nde bantu na Yandi kuvanda mpidina.

Baverse ya Bible sambu na baleso yai zole:

Kubasika 20 :17 (Nsiku ya nsuka ya Bansiku Kumi ya Nzambi)

17 “Kuyuma ntima ve na nzo ya ngani. Kuyuma ntima ve na nkento ya ngani to bampika to bangombe to bampunda to konso kima ya ngani.”

Baebreio 13 :5

5 Na luzingu na beno, beno lenda pesa ntima na beno na mbongo ve ; kansi beno fweti vanda na kiese na bima yina ya beno ke na yo ntete, sambu Nzambi yandi mosi me tubaka nde : “Mono ta bikisa nge ve ata fioti.”

Baleso ya ke songa diswaswanu na kati ya mabanza ya zole, Kuvanda na kiese na yina Nzambi me pesa nge, ti Kuyuma ntima sambu na bima ya nkaka ya Nzambi me pesa nge ve:

Leso 1—

Abrahami kele na kiese na kuvanda na ntoto, kansi Loti yuma ntima kuvanda na ntoto ya kuluta kitoko (Kuyantika 13:5-17)

Leso 2—

Kingana ya Yesu ya Mvwama ya Tungaka Banzo Kuluta Nene, ti Nzambi Sansa Bandeke (Luka 12:15-24)

Kikuma sambu na Baleso yonso zole:

Na nsuka ya baleso yai, bana ta bakisa nde Nzambi ke menga mpila bantu ke yuma ntima sambu na bima Yandi me pesa bo ve; Yandi ke mona yo masumu. Kansi Yandi ke zola ntangu bantu na Yandi ke na kiese na yina Yandi me pesa bo. Yandi zola yo sambu yo songa nde beto ke tula Yandi ntima kusala ti kupesa yina me luta mbote sambu na beto. Ebuna, bana ta yantika kutunga mabanza kuvanda na kiese na yina Nzambi me pesa bo, ti bo ta yantika kutonda Yandi sambu na bampila yonso Yandi me sakumuna bo.

Bankunga ya kwenda nzila mosi ti baleso yai zole:

(Na mukanda ‘Bankunga ya Ecodim’ ya MCE)

‘Kilumbu Yai Nzambi Me Sala’

‘Mfumu Zaba Nzila na Mono’

‘Mono Kele na Nzo Kitoko’

‘Mono ta Mona Kiese’

‘Nzambi ke Mbote’

‘Nzambi na Mono ta Pesa’

Leso 1

Abrahami kele na kiese na kuvanda na ntoto, kansi Loti yuma ntima kuvanda na ntoto ya kuluta kitoko.

Leso yai ke monika na Bible na Kuwakana ya Ntama : Kuyantika 13:5--17

(Longi, NB ! Beto me sonika baverse yonso ya lesa awa sambu nge lenda longuka yo. Nge ta tanga yai yonso na bana mbala mosi ve, kansi nge ta tanga ndambu baverse bonso ke monika na malongi ya nene ya lesa.)

Kuyantika Leso:

Mono me wa histoire sambu na mukaku ya zola batoffee mingi. Lumbu mosi, mwana-bakala pesaka yandi batoffee zole, ti yandi zolaka yo mingi. Na nima, yandi vandaka yindula konso ntangu kaka inki mutindu yandi lenda kuzwa batoffee ya nkaka. Yandi yumaka ntima sambu na batoffee tii yandi yindulaka ata kuyiba batoffee. Lumbu mosi, yandi monaka nde kielo vandaka kukangula kukota na magasin.

Na kati ya magasin, yandi monaka mulangi kufuluka na batoffee. Na zulu ya mulangi vandaka ndambu fioti, kansi yo lungaka nde yandi kotisa diboko na yandi na kati. Mukaka kotisaka diboko na yandi nswalu, ti yandi nikisaka misapi na yandi sambu na kutula batoffee mingi na diboko na yandi.

Kansi yandi zolaka batoffee kuluta. Ebuna yandi pusaka na konso musapi, tii ntangu diboko na yandi me fuluka ngolo. Yandi vandaka na kiese mingi. Ah, yandi zolaka batoffee mingi. Yandi yantikaka kuwa nsudi na yo na munoko na yandi. Kansi ata ntangu yina, yo lungaka ve. Toffee mosi me bikala na muloangi. Yandi pusaka ngooolo ti na nsuka, yandi vandaka na batoffee yonso na diboko na yandi.

Diboko na yandi kufuluka na batoffee, yandi mekaka kukatula diboko na mulangi. Yandi bendaka diboko ngolo, kansi, ti diboko kufuluka ya batoffee, yandi monaka ve mpila kukatula diboko na yandi. Yandi pusaka. Yandi nikanaka. Yandi bendaka. Mpila vandaka ve. Yandi lendaka ve kukatula diboko na mulangi yina.

Nkwa-magasin monaka yandi kuna na suka, diboko na yandi fuluka ya batoffee, diboko na kati ya mulangi. Nkwa-magasin yantikaka kusosa dibaya ya nene sambu yandi bula mukaku yina. Mukaku ya yumaka ntima monaka yandi, kansi tii ntangu yina, yandi losaka ve batoffee yina. Nkwa-magasin vutukaka, kansi mukaka kaka monaka yandi ngolo, diboko na yandi fuluka na batoffee. Wham! Wham! Nkwa-magasin bulaka yandi ngolo ti yandi fwaka. Fami ya nkwa-magasin kudiaka stew ya mukaku mpimpa yina.

Yonso sambu mukaka yumaka ntima na mpila nde yandi monka ve mpila kubika batoffee na yandi.

Transitio na Leso ya Bible:

Mukaku yina vilaka batoffee yonso ya vandaka kukangama na diboko na yandi, ti yandi vilaka moyo na yandi mpi sambu yandi monaka ve kiese na batoffee ya yandi vandaka na yo. Konso ntangu, yandi zolaka kuluta. Yandi yumaka ntima sambu na batoffee, ti na nsuka yandi kufwaka sambu na yo.

Na histoire ya Bible ya beto ta mona bubuyai, beto ta mona muntu zina ya Loti ya vandaka kuyuma ntima mingi, ti oncle na yandi, Abrahami. Abrahami me longuka kumona kiese na yina Nzambi me pesa yandi. Yandi tulaka Nzambi ntima kupesa yandi konso yina ya vandaka mfunu. Beto mona bantu yai zole, Loti ti Abrahami, na mukanda ya Kuyantika, kapu 13. Yai kele mukanda ya ntete ya Bible. Beto yantika na nzila ya kutanga 5.

Malongi ya Leso Yai na Bandambu 6 & Mpila Bana Lenda Participer:

1. Loti ti Abrami, bo zole vandaka na bambisi ti bantu ya kisalu. Kuyantika 13:5-6

Kutanga: Kuyantika 13:5

5 Loti yina kwendaka nzila mosi ti Abrami, yandi mpi vandaka na mameme, bankombo, bangombe ti bantu na yandi ya kisalu. (Na nima, Nzambi baluluka zina na yandi ti yo kumaka Abrahami.)

Kuyula:

- Nani kwendaka nzila mosi ti Abrahami?
(Loti, neveu ya Abrami. Abrami vandaka oncle ya Loti.)
- Keti Loti vandaka nsukami ya vandaka na bima mingi ve? (Ikele ve. Yandi mpi vandaka na bambisi mingi to bantu ya kisalu ya sadisaka yandi.) Abrami mpi vandaka na bima yina. Nzambi me sakumuna bo zole na bampila mingi.)

2. Bantu ya kisalu na bo vandaka na kunwana sambu ntoto lungaka ve kupesa luzingu ya mbote na bo yonso zole. Kuyantika 13:6-7

Kutanga: Kuyantika 13:6-7

6 Bo yonso zole vandaka na bambisi mingi mpenza, yo yina mpila vandaka ve nde bo zinga kisika mosi sambu ntoto vandaka fioti.

7 Ebuna bantu yina vandaka kukeba bambisi ya Abrami ti bayina vandaka kukeba bambisi ya Loti, bo vandaka kuswana mingi. (Na ntangu yina bantu ya Kanana ti bantu ya Perizi vandaka kuzinga kaka na ntoto yina.)

Kuyula:

- Sambu na inki bampangi yai Abrami ti Loti vandaka ve na mpila kuzinga sikamosi?
(Sambu bo vandaka na bambisi mingi na mpila nde ntoto vandaka fioti sambu na bo. Yo yina, bantu ya kebaka bambisi na bo vandaka kuswana mingi.)
- Inki makanda zole ya nkaka ya bantu vandaka kuzinga na ntoto yina ntangu mosi ti bo?
(Makanda ya Kanana ti ya Perizi. Ntoto fweti kusuporter bo mpi.)

- Nge banza nde bantu ya kisalu na bo vandaka kunwanina inki?
(Ntoto sambu bambisi kudia na yo, ti mbala ya nkaka, masa na ntoto yina.)

Kusonga inki me salama :

Bavolontaire ya bana lenda sala bageste bonso bo kele bantu ya kisalu ya Abrami ti ya Loti, ke swana sambu na ntoto. (Longi, NB—Kuswana yina ta vandaka ya munoko kaka, bo ta bulana ve.)

Na nima, bo yonso tuba, na mpila ritimika:

Ntete, bo yumaka ntima. Ya zole, bo nwanaka.

3. Abrami pesaka Loti nzila kusola ntete inki ntoto yandi zolaka, ebuna yandi ta mona kiese na konso ntoto ya me bikala. Kuyantika 13:8-9

Kutanga: *Kuyantika 13*

8 Ntangu yai Abrami tubilaka Loti nde: “Nge kele mwana na mono, mono kele tata na nge. Mono zola ve nde bantu na nge ti bantu na mono bo swana.”

9 Pardo, beto kabana. Nge ta sola nge mosi ntoto yina ya nge zola. Kana nge kwenda nzila yai, mono ta kwenda nzila yina; kana nge kwenda nzila yina, mono ta kwenda nzila yai.”

Kuyula:

- Nani tubaka ntete sambu na kumeka kumanisa kuswana yina?
(Abrami. Yandi vandaka mbuta, ti yandi twadisaka voyage. Kieleka, mpila kusola ntoto vandaka droit na yandi.)
- Sambu na inki Abrami zolaka ve kunwana ti Loti?
(Bo vandaka bampangi, fami mosi. Yo vandaka mbote ve nde bampangi kunwana.)
- Inki mutindu Abrami zolaka kumanisa mambu yina?
(Loti lenda sola ntete inki ntoto yandi zolaka kubaka, ebuna Abrami ta baka ntoto ya me bikala.)
- Keti nge mona nde ntima ya Abrami vandaka na kiese na yina ya Nzambi ta pesa yandi, to ntima na yandi vandaka na kuyuma sambu na ntoto?
(Ntima na yandi vandaka na kiese na konso yina Nzambi ta pesa yandi. Yandi zabaka nde Nzambi ta lunda yandi ata yandi kwenda nzila yai to nzila yina.)

Kusonga inki me salama na theatre:

Bana zole ya bakala sala bageste bonso bo kele Abrami ti Loti, ti bo songa mpila Abrami pesa Loti mpila kusola ntoto na yandi ntete.

4. Ntima ya Loti yumaka sambu na ntoto ya kuluta kitoko—ntoto ya Yordani. Kuyantika 13:10-11**Kutanga: Kuyantika 13:10-11**

10 Ebuna Loti talaka ndambu na ndambu; yandi monaka nde nseke yina yonso katuka lweka ya nzadi ya Yordani tii na bwala Soare, yo kele kitoko, yo mpi ke na masa mingi. Yo kele bonso kilanga ya Mfumu Nzambi to bonso nsi ya Ezipte. (Na ntangu yina Mfumu Nzambi vandaka me fwa ntete ve babwala Sodome ti Gomore.)

11 Loti solaka nseke yina yonso ya Yordani sambu na yandi mosi, yandi kwendaka na ndambu ya este. Yai kele mutindu Abrami ti Loti kabanaka.

Kuyula:

- Na kuzenga inki ntoto kusola, Loti yindulaka inki?
(Yandi yindulaka kaka ntoto vandaka na masa mingi ti kana yo vandaka kitoko na meso, ti banti mingi kuyela kuna.)
- Inki Loti yindula ve, ya zolaka kuvanda mbote kuyindula?
(Yandi yindulaka ve bantu ya zingaka kuna ti mpila bo lenda benda fami na yandi. Yandi mpi yindulaka ve kubinga Nzambi ti kusosa kutwadisa na Yandi. Yandi mpi yindulaka ve kutuba nde bonso Abrami vandaka mbuta, yandi kusola ntete. Kansi yandi salaka yai yonso ve. Yandi yumaka ntima ti yandi solaka ntoto yandi monaka kuluta kitoko.)
- Loti kwendaka na inki directio?
(Yandi kwendaka na Este.)

Kusonga inki me salama:

Bana yonso sala bageste bonso bo kele Loti, ke yuma ntima sambu na ntoto ya kitoko ya Yordani.)

Kuyimba ti kukina:

Loti yumaka ntima na ntoto kitoko
Ebuna yandi solaka na mpila ya mbi.

Ntoto vandaka kitoko, kansi bantu vandaka mbi
Ebuna yandi solaka na mpila ya mbi.

5. Abrami kwendaka na Mamre, na ntoto ya me bikala. Kuyantika 13:12

Kutanga: Kuyantika 13:12:

12 Abrami bikaka na nsi ya Kanana. Ebuna Loti kwendaka kuzinga na kati ya babwala ya nseke yina, yandi tungaka penepene na bwala Sodome.

Kuyula:

- Abrami zingaka na inki ntoto?
(Na ntoto ya Kanana.)
- Loti zingaka wapi?
(Na babwala ya nseke yina. Yandi tungaka penepene na bwala Sodome.)
- Keti yo ke monika nde Abrami vandaka na makasi to nde yandi vandaka na kiese ve sambu Loti solaka ntoto ya kuluta kitoko?
(Ikele ve. Yandi vandaka na kiese kuzinga na ntoto ya me bikala na nima Loti solaka ntoto na yandi.)
- Inki mutindu mpila Abrami salaka ke songa nde yandi tulaka Nzambi ntima?
(Yandi kwikilaka nde Nzambi lenda pesa yandi luzingu ya mbote ti kulunda yandi, ata yandi vandaka wapi, ata ntoto vandaka mbote to mbote mingi ve.)

Kusonga inki me salama:

Bana yonso sala bageste bonso bo kele Abrami na mpimpa na nima yandi me pesa Loti mpila kusola ntoto na yandi. Yandi ke lala mpongi ya mbote, na ngemba ti kiese sambu yandi zaba nde Nzambi me pesa yandi ntoto Yandi zolaka yandi kuvanda na yo, ti Nzambi ta landa kaka kulunda yandi.

6. Mpila Loti solaka, yo twadisaka yandi ti fami na yandi na bampasi mingi na nima, sambu bantu ya ntoto yina vandaka ya masumu mingi. Na nima ya ntangu, Nzambi fwaka bwala yina kimakulu. Kuyantika 13:13

Kutanga: Kuyantika 13:13

13 Bantu ya bwala yina vandaka bantu ya mbi, bo vandaka kusala masumu mingi na meso ya Mfumu Nzambi.

Kuyula:

- Bantu ya zingaka na Sodome penepene na Loti, bo vandaka inki mutindu?
(Bantu ya mbi ya salaka masumu mingi na meso ya Nzambi)
- **Longi, NB:** (Tangila bana sommaire yai sambu na bwala Sodome:) Na nima, na mukanda ya Kuyantika, kapu 18 ti 19, beto tanga mpila masumu ya Sodome vandaka, ti inki mutindu Nzambi fwaka bwala,

kubwisa yo tiya ti ngolo. Bawanzio bendaka Loti ti fami na yandi na kingolo-ngolo kukatuka sambu bo mpi kufwa ve, kansi babakala ya kwelaka bana-bankento ya Loti, bo fwaka sambu bo buyaka kukatuka.

Nkento na yandi mpi balulaka sambu yandi zolaka ve kukwenda, ebuna tiya simbaka yandi. Bambisi na yandi fwaka, nzo ti bima yonso yandi vandaka na yo na kati ya tiya yina.

Bana-bankento na yandi longukaka bampila ya masumu na bantu ya Sodome, ti bo pesaka yandi kiese ve na mambu ya bo salaka.

Keti nge banza Nzambi zabaka na ntwala nde mambu yai yonso ta salama? (Ee, Nzambi zaba mambu yonso, ebuna yo fweti vanda nde Yandi zabaka. Kansi Loti yulaka Yandi ve inki yandi fweti sala.

Kumanisa Leso:

Abrami pesaka Loti mpila kuzenga ntete inki ntoto yandi ta zola. Yandi salaka yo kunata ngemba na kati ya fami, ti yandi tulaka ntima na Nzambi kulunda yandi.

Loti solaka ntoto ya monikaka kuluta mbote sambu na yandi mosi, kukonda kuyindula Nzambi. Kana ntima na beto kele kuyilama na Nzambi, beto tula ntima nde Yandi zaba yonso ya beto ke na yo mfunu, ti Yandi ta pesa beto yina ya me luta mbote sambu na beto. Bien sur, yo kele ve mbi kuvanda na ntoto ya mbote, to konso kima ya mbote. Kuvanda na kiese na yina ya Nzambi me pesa beto, yo ke tuba ve nde beto fweti vanda kaka na bima ya kele mbote mingi ve, kansi yo ke tadila kutula ntima na Nzambi kupesa beto yina ya Yandi mona kuluta mbote sambu na beto. Yo kele lusakumunu ya nene ntangu ntima na beto kele content, kele kutula ntima na Nzambi kupesa beto bima ya Yandi ke mona mbote!

Devoir sambu na bakristo:

Beto tanga na Baebreio 13:5: *Na luzingu na beno, beno lenda pesa ntima na beno na mbongo ve; kansi beno fweti vanda na kiese na bima yina ya beno ke na yo ntete, sambu Nzambi yandi mosi me tubaka nde: “Mono ta bikisa nge ve ata fioti.”*

Kana nge me yamba Yesu Kristo bonso Mvulusi na nge, nge me baka dezia yina ya nge vandaka na yo kuluta mfunu. Ebuna nge lenda tula ntima na Nzambi mpi nde Yandi ta lunda nge ti sadisa nge na konso kima nge ke na yo mfunu. Nzambi songa beto bakwikidi kuvanda content to kuvanda na kiese, kuvanda ya kuyikana na yina ya Nzambi pesa beto. Nge lenda tunga mpeve yina ya kiese kana nge ta tonda Nzambi konso lumbu sambu na balusakumunu ya mingi Yandi ke pesa nge dezia.

Yo yina, mono ke pesa beno bakristo devoir yai: Bubuyai, Tonda Nzambi sambu na bampila Yandi me sakumuna nge, ya nene ti ya fioti. Meka kutonda Yandi na mambu yonso ya mbote ya Yandi me sala sambu na nge dezia. Nge ta mona nde mpeve ya kiese ta yantika kuyela na kati ya nge!

Kubinga bana na Yesu:

Kuyuma ntima sambu na bima ya Nzambi me pesa beto ve, yo kele kaka mosi na kati ya masumu ya beto me sala. Bible ke songa beto nde, “Bantu yonso me salaka masumu, bo ke na lukumu ya Nzambi mpi ve” (Roma 3:23). Beto lenda kota na zulu ve na nzila ya kusala kuluta mbote. Nzambi lenda ve pesa nzila sambu na masumu kukota na bwala na Yandi.

Yesu Kristo, Mwana ya Nzambi, Yandi futaka menga na Yandi sambu na kumanisa mfuka ya masumu na beto ntangu Yandi fwaka na zulu ya kulusi sambu na beto. Yandi me bikala ve na lufwa, kansi Yandi telamaka na lufwa. Bubuyai Yandi kele na moyo, ebuna Yandi lenda kuwa nge ntangu nge kubinga zina na Yandi. Kana nge me tula ntima na yandi ntete ve, Nzambi ke sila nge nde “Konso muntu yina ta samba to binga zina ya Mfumu Nzambi, yandi ta guluka” (Roma 10:13). Keti nge ta binga Yandi bubuyai ti lomba Yandi kugulusa nge? Kana nge zola kuyamba Yesu bubuyai na mbala ya ntete, mono ta vanda na kiese kusolula ti nge na nima ya classe.

===

NSUKA YA LESO 1

===

Leso 2—

Kingana ya Yesu—Mvwama ya Tungaka Banzo Kuluta Nene Kubumba Bima & Mpila Nzambi ke Pesa Madia na Bandeke

Nge lenda mona histoire yai na Bible na: Luka 12:15-24

(Longi, NB! Beto me pesa baverse yonso awa sambu na kusadisa nge kulonguka lesa yai na ntuala ya kulonga yo. Yai yonso nge ta tangila bana ve mbala mosi, kansi nge ta tangila bo kaka baverse ya beto pesa na Malongi ya Nene ya lesa yai.)

Longi, tanga baverse yai sambu na kuyilama kulonga:

15 Ebuna yandi(Yesu) tubilaka bantu yonso nde: “Beni keba! Beni katula mabanza yonso ya kuzola kimvwama. Sambu luzingu ya kieleka ya muntu yo kele ve sambu na bima na yandi, ata na ntangu yina ya yandi kele mvwama.

16 Ntangu yai, Yesu telaka bo kingana yai: ‘Kuvandaka na mvwama mosi vandaka na bilanga; bilanga na yandi butaka bima mingi.

17 Yandi yantikaka kuyindula kuyindula na ntima na yandi nde: ‘Mono ke na kisika ve ya mono lenda bumba bima na mono yai yonso, ebuna nki mono fweti sala?’

18 Ebuna yandi tubaka na ntima na yandi nde: ‘Mono ke sala mpidiyai: Mono ke fwa banzo yina ya mono ke bumbaka bima, mono ke tunga banzo ya nkaka ya kuluta nene; ebuna mono ta tula bambuma na mono yonso ti bima na mono yonso muna.

19 Ebuna mono ta tuba mono mosi nde: Nge me buma bima mingi-mingi sambu na bamvula mingi. Pema ka nge, dia, nwa, sala fete.’

20 Kansi Nzambi tubilaka yandi nde: Nge zoba yai, na mpimpa yai kaka, mono ke katula moyo na nge. Ebuna bima yai yonso ya nge me bumba, yo ta vanda ya nani?’ ”

21 Na kumanisa, Yesu tubaka nde: “Yo kele mpidina na konso muntu yina ke bumbaka kimvwama sambu na yandi mosi, kansi yandi kele mvwama ve na meso ya Nzambi.

22 Ntangu yai Yesu tubilaka balonguki na yandi nde: “Yo yina mono ke tubila beni nde: Beni lenda mona mpasi ve nde nki beni ta dia sambu na luzingu na beni, to nde nki bilele beni ta lwata na nitu na beni.

23 Sambu moyo me luta madia na mfunu, nitu me luta bilele na mfunu.

24 Beni tala bandeke yai minganga: bo ke kunaka ve, bo mpi ke katulaka ve bima na bilanga; bo ke na kisika to nzo ya kubumba madia ve. Kansi Nzambi ke pesaka bo madia! Beni me luta bandeke na mfunu!

Kuyantika lesa:

Mwana zina ya Kitoko vandaka na bilele mingi, kansi konso ntangu yandi zolaka bilele kuluta kaka. Yandi kangaka luse na yandi na mpila mosi ya mbi, kana bibuti na yandi songaka yandi nde bo lenda ve sumba lele ya nkaka ya mpa. Kitoko zolaka kutala bafoto ya bilele ya kitoko mingi. Na mabanza na yandi, yandi kudimonaka na konso lele, bonso ndosi.

Lumbu mosi, tata na yandi solulaka ti yandi sambu na mabanza na yandi, attitude na yandi ya kuyuma bilele konso ntangu, mpi kuvanda kiese ve na yina ya Nzambi me pesa yandi dezia.

“Mabanza na mono kele masumu ve!” Kitoko tubaka. “Mono me yiba ve bilele na mono, ebuna kana mono yiba yo ve, inki mambu kana mono yuma ntima na bilele?”

Bana, inki beno banza? Keti Kitoko tubaka kieleka? Keti yo kele masumu kuyuma ntima sambu na bima ya nkaka?

Mpila Kitoko tubaka vandaka ve bonso mpila Nzambi zola sambu na bantu na Yandi. Ntangu ya Nzambi pesaka beto Bansiku Kumi ya nene, Yandi tubaka nde beto kuyuma ntima ve. *Kubasika 20:17*, nsuka ya Bansiku Kumi, ke tuba nde: “*Kuyuma ntima ve na nzo ya ngani. Kuyuma ntima ve na nkento ya ngani to bampika to bangombe to bampunda to konso kima ya ngani.*”

Kitoko tubaka nswalu nde, “Yo ke tuba ve kuyuma ntima ve na bilele!”

Tata talaka yandi. “Ebuna, inki nge banza kele na kati ya bandinga yai, “*konso kima*”? yandi yulaka. “*Kuyuma ve... konso kima ya ngani.*” Keti bilele ikele ve na kati ya “*konso kima*”?

Transitio na Leso ya Bible:

Yesu tubaka kingana sambu na muntu ya vandaka kuyuma ntima mingi. Yesu songaka beto ve zina na yandi, sambu kingana yai, yo lenda kuvanda mono, to nge, to konso muntu. Beto mona yo na mukanda ya Luka, kapu 12, nzila ya kutanga 15.

Malongi ya Nene ya Leso Yai na Bandambu 6, ti Mpila Bana Lenda Participer:

1. Yesu songaka bantu kukeba nde bo kuyuma ntima ve, sambu moyo ya muntu kele kiteso mosi ve na bima ya yandi ke na yo. Luka 12:15

Kutanga: *Luka 12:15*

15 Ebuna yandi(Yesu) tubilaka bantu yonso nde: “Beni keba! Beni katula mabanza yonso ya kuzola kimvwama. Sambu luzingu ya kieleka ya muntu yo kele ve sambu na bima na yandi, ata na ntangu yina ya yandi kele mvwama.

Kuyula:

- “Kukeba” disongidila inki?
(Disongidila nde, ‘Atasio!’ Kutala mbote nde nge sala mambu yina ve.)
- Inki kele ndambu bima ya nge ke na yo?
(Longi, pesa ntangu sambu na bana kuyindula ti tuba. Bo lenda tuba bonso bilele, nzo, mikanda, etc.)
- Inki mutindu bima yai kele na diswaswanu ti moyo na nge?
(Bo lenda vila bima, kansi moyo ke bikala.)
- Inki yo zola tuba nde muntu kele mvwama?

(Yandi ke na bima mingi, kuluta yina ya kele mfunu. Beto fweti vanda na mpasi na ntima ve nde beto ta vanda na bima ya kulunga. Nzambi zaba inki beto ke na yo mfunu, ti Yandi ta pesa beto yina kele mfunu.)

Repetitio Ritimika:

Ye-su tu-ba-ka, “Be-no ke-ba! Ka-tu-la ma-ban-za yon-so ya ku-zo-la bim-vwa-ma.” (Tuba yo mbala 3 to 4.)

2. Yesu tubaka kingana ya mvwama ya vandaka na ntoto ya mbote ya butaka bima mingi, na mpila nde yandi fweti tunga banzo ya kuluta nene kubumba yo.

Kutanga: Luka 12: 16-18

16 Ntangu yai, Yesu telaka bo kingana yai: ‘Kuvandaka na mvwama mosi vandaka na bilanga; bilanga na yandi butaka bima mingi.

17 Yandi yantikaka kuyindula na ntima na yandi nde: ‘Mono ke na kisika ve ya mono lenda bumba bima na mono yai yonso, ebuna nki mono fweti sala?’

18 Ebuna yandi tubaka na ntima na yandi nde: ‘Mono ke sala mpidiyai: Mono ke fwa banzo yina ya mono ke bumbaka bima, mono ke tunga banzo ya nkaka ya kuluta nene; ebuna mono ta tula bambuma na mono yonso ti bima na mono yonso muna.

Kuyula:

- Kingana kele histoire ke tadila luzingu yai, mbala mingi luzingu ya bantu ordinaire, ya ke longa malongi ya kimpeve. Yesu zolaka mpila yai ya kulonga, ti yandi sadilaka yo mingi. Ebuna, na kingana yai, inki beto mona?

(Yo ke tadila bilanga, kimalu ya bantu ordinaire, kansi na kati na yo beto ta mona malongi ya kimpeve.)

- Inki vandaka probleme ya muntu na kingana yai?

(Ntoto na yandi vandaka mbote mingi, ti yo butaka bima mingi. Ebuna yandi vandaka ve na kisika ya kubumba yo yonso.)

- Inki vandaka lukanu na ntima na yandi?

(Yandi yindulaka nde yandi ta panza banzo ya kubumba ya yandi vandaka na yo, ebuna yandi ta tunga banzo kuluta nene.)

- Keti nge lenda yindula bima ya nkaka yandi lendaka kusala?

(Kupesha ndambu na bansukami, to kuna mingi ve sambu yandi lenda sadila ntangu na yandi kusala mambu ya nkaka ya mbote, to kupesa bantu ya nkaka mpila kukuna bilanga na bo na ntoto na yandi.)

Kusonga inki me salama:

Bana yonso lenda sala theatre bonso bo ke panza nzo mosi, bo ke tunga nzo ya kuluta nene, na mpila mvwama yina yindulaka.

Repetitio ritimika:

Bana yonso tuba na kimvuka, bonso muntu ya ke yuma ntima:

“Kuluta! Kuluta! Bima ya kuluta!

Kuluta! Kuluta! Pesa mono kuluta!”

3. Yandi yindulaka nde bonso yandi me bumba madia mingi, ebuna yandi lenda pema.

Kutanga: Luka 12:19

19 Ebuna mono ta tuba mono mosi nde: Nge me buma bima mingi-mingi sambu na bamvula mingi. Pema ka nge, dia, nwa, sala fete.’

Kuyula:

- Sambu yandi me bumba bima kulunga bamvula mingi, yandi yindulaka kusala inki?
(Kupema, kudia, kunwa, kusala fete.)
- Inki vandaka probleme ti lukanu na yandi?
(Yonso tadilaka yandi mosi, ti Nzambi vandaka na kati na yo ve.)

Kusonga inki me salama:

Bana yonso sala bageste bonso muntu ya me yilama kubaka repos, kusakana.

4. Nzambi bingaka yandi zoba, sambu mpimpa yina kaka, Yandi ta baka moyo na yandi, ebuna bima ya yandi me bumba, yandi ta vila yo yonso.

Kutanga: Luka 12:20

20 Kansi Nzambi tubilaka yandi nde: Nge zoba yai, na mpimpa yai kaka, Mono ke katula moyo na nge. Ebuna bima yai yonso ya nge me bumba, yo ta vanda ya nani?’ ”

Kuyula:

- Nzambi bingaka nkwa-bilanga inki?
(Nge zoba yai)
- Sambu na inki yandi vandaka zoba?
(Sambu Nzambi vandaka na lukanu kubaka moyo na yandi kaka na mpimpa yina, ebuna kaka mbala mosi yandi ta vila bima yonso ya yandi me sala ngolo kubaka.)

Kusonga inki me salama:

Bana sala bageste bonso ntima ke sala bo attacki. Bo binga nde, “Mono me vanda zoba! Mono fweti vila bimvwama na mono yonso!”

5. Yesu tubaka nde kingana yina vandaka foto ya bantu ya bumba bimvwama sambu na bo mosi, kansi bo kele bamvwama ve na meso ya Nzambi.

Kutanga: Luka 12:21

21 Na kumanisa, Yesu tubaka nde: “Yo kele mpidina na konso muntu yina ke bumbaka kimvwama sambu na yandi mosi, kansi yandi kele mvwama ve na meso ya Nzambi.

Kuyula:

- Ata mvwama yai yindulaka mambu mingi, yandi vilaka inki?
(Yandi vilaka mambu ya kimpeve. Yandi vilaka Kimfumu ya Nzambi.)
- Yesu zola beto kusosa luzingu ya inki mutindu?
(Luzingu ya ke kitula beto mvwama na meso ya Nzambi—luzingu ya ke yindula mambu ya kimpeve, mambu ya Kimfumu ya Nzambi)
- Bima yonso ya beto ke na yo, kele Nzambi me pesa beto yo. Inki mutindu beto lenda sadila bima yina kuvanda mvwama na meso ya Nzambi?
(Kusadisa bansukami, kusadisa dibundu ti bisalu missionaire, kusumba Babible sambu na bo ya lenda ve kusumba yo, etc.)

6. Yesu songaka balonguki na yandi nde Nzambi zola ve beto mona mpasi na ntima, kansi kutula ntima na Yandi kupesa beto yina ya beto ke na yo mfunu, bonso Yandi ke pesa madia na bandeke.

Kutanga: Luka 12:22-24

22 Ntangu yai Yesu tubilaka balonguki na yandi nde: “Yo yina mono ke tubila beno nde: Beno lenda mona mpasi ve nde nki beno ta dia sambu na luzingu na beno, to nde nki bilele beno ta lwata na nitu na beno.

23 Sambu moyo me luta madia na mfunu, nitu me luta bilele na mfunu.

24 Beno tala bandeke yai minganga: bo ke kunaka ve, bo mpi ke katulaka ve bima na bilanga; bo ke na kisika to nzo ya kubumba madia ve. Kansi Nzambi ke pesaka bo madia! Beno me luta bandeke na mfunu!

Kuyula:

- Yesu zola ve nde beto mona mpasi sambu na inki bima?
(Madia, luzingu, bilele)
- Keti yai yonso kele bima ya beto ke na yo mfunu ya kieleka?
(Ee, beto ke na mfunu ya bima yina yonso.)
- Yesu sadilaka inki bonso mbandu kusonga beto nde Nzambi ta pesa bima yonso ya beto ke na yo mfunu?

(Yandi sadilaka bandeke bonso mbandu. Bo ke kuna bilanga ve, bo ke buka bambuma na bilanga ve sambu na kubumba yo, kansi Nzambi pesa bo madia ya kulunga sambu na bo.)

- Yesu tubaka inki sambu na valeur to mfunu ya bantu?

(Beto bantu luta bandeke na mfunu.)

Nkunga ya ke kwenda nzila mosi ti baleso yai:

Vanda na kiese na yonso
ya Nzambi mene pesa nge
Vanda na ntima lutondo
Yandi lenda kulunda nge
Kuyuma ntima ve
na bima ya nkaka
Nzambi zola yo ve.
Vanda mvwama na meso n'Yandi!

Kumanisa leso:

Yesu tubaka nde yo kele buzoba kusosa kubumba bima ya nkaka, kana Nzambi me pesa nge dezia yina ya nge ke na yo mfunu. Yo kele buzoba sambu Nzambi lenda baka moyo ya nge na konso minute, ebuna nge ta bikisa bimvwama yina yonso. Kuluta mbote kusadila yina ya Nzambi me pesa nge sambu na kupusa Kimfumu ya Nzambi. Ebuna, nge ta kuma mvwama na meso ya Nzambi. Probleme na beto kele ve bima ya beto ke na yo to beto ke na yo ve. Probleme ikele mabanza na beto sambu na bima ya beto ke na yo. Keti beto ke twadisa bima na beto, to bima yina ke twadisa beto?

Devoir sambu na bakristo:

Kana nge me tula ntima na Yesu bonso Mvulusi na nge, vanda na lutondo ya mingi sambu na bima Nzambi me pesa nge, ti tula Yandi ntima kupesa nge konso kima ya nkaka ya nge ke na yo mfunu. Na mposo me luta, beto pesaka beno devoir kusala mpidina. Nani lenda songa beto inki bo salaka? (Longi, pesa ntangu sambu na bana kupesa mvutu.

Mposo yai, mono ke pesa beno devoir yai: Beno sala ngolo kuvanda na kiese na yina ya Nzambi me pesa nge. Pesa Yandi matondo. Mabanza na nge ta pesa Nzambi kiese. Ebuna yantika kuyindula inki mutindu nge lenda sadila yina ya Nzambi me pesa nge sambu nge kuma mvwama na meso ya Nzambi.

Kubinga bana na Yesu:

Kana nge me tula ntima na Yesu bonso Mvulusi na nge ntete ve, zaba nde mpulusu ti ndolula ya masumu kele makabu ya Nzambi zola kupesa nge kaka na minute ya nge tula ntima na mwana na Yandi. Keti nge ta binga Yandi bubuyai ti songa Yandi nde nge ke yamba Yandi na ntima ti na luzingu na nge? Kana nge ke na mfunu ya lusadis, SVP, kwisa na mono na nima ya classe. Mono ta vanda na kiese kusolula ti nge.

===

NSUKA YA BALESO YONSO ZOLE

===